

thuhunge an den enden, do die beschuldigten zcu rechtvertigen gehören, wartten unde  
 üch in dem also bewysen, das die gnanten gebrudere unsir vorschrift yn nuczlich  
 irkennen unde er Iharislaw uns deßhalb nicht mehr irsüchen dorffe. Daran geschüt  
 uns sunderlich wol zcu danncke. Datum Dreßden feria 6<sup>a</sup> Cecilie anno 20. LXXI<sup>o</sup>.

5

162.

*Schreiben Kurfürst Ernst's und Herzog Albrecht's an die Universität, die Abnahme derselben, die  
 Abwesenheit der Collegiaten, welche bei Strafe einberufen werden sollen, und den Mangel nützlicher  
 und fleißiger Vorlesungen über Astronomie und Mathematik betreffend.* **Leipzig, [1471?]**

*Hdschr.: Concept Hauptstaatsarchiv Dresden W.A. Universität Leipzig Bl. 23.*

10 *Ann.: Wegen der Zeitbestimmung vergl. No. 163 und 165.*

Liben andechtigen. Als unßer hoeschule bey uch sere abegenommen hat und  
 geringet ist, gelanget an uns, das sollichs auch neben andern ein ursache sey, das vyl  
 collegiaten in den collegien lange absencien haben unde zcu czyten irer wenig residiren.  
 Das sollich gebrech reformirt moge werden, begern wir von üch mit flisse, ir wollet mit  
 15 den probsten unde meistern aller collegyen bey uch reden unde yn von unser wegen zcu  
 irkennen geben, das sie hynnforder keynem irem mittcollegiaten ane unsir willen unde  
 wissen lenger danne eyn halb iar absencien geben, deß wir uns selbst auch ab eß zcu  
 stund an uns gelangen unde von uns gebeten wurde auch mesßigen wollen, unde das  
 sie von stund alle dieihenigen die abweßend syn zcu irer residencien fordern, bei irer  
 20 alden gewonlichen penen unde verlyßunge der collegiaturen. Ab eczliche weren, die  
 zcu irer abesencien unser gunst unde volbortt hetten, das sie sich deß daran nicht keren,  
 wenn wir unsir gunst unde laube hirmit wandeln unde wedderruffen, das sie yn auch  
 zcu wissen thun mogen unde das sie in der wale der collegiaten, so ymands todis  
 halben abegehen adder ire collegiaturen obbirgeben wurden, luterlich unde truwelich  
 25 handeln, fromme tugentliche unde wolgelerte meister, die ir ampt auch mitt volbringen,  
 welen unde in der obbirgebunge keyne vorwortt den adder den uffezunemen, zculassen,  
 also wir bericht werden ufte geschyt, sundir ire wale fry behalden noch dem besten zcu  
 kysen. Wir vernemen auch, das iczt in unser hoenschulen keyner in der astronomei  
 unde mathematica nützlichen noch flißlichen leße, adder etwas practicire, das auch eine  
 30 ringerunge bringet der universitet; wollet mit den egnanten collegiaten auch reden unde  
 sie von unser wegen anhalden, das sie schaffen unde bestellen nach dem mal das sie  
 zcu verweßung unde redelichir regirunge der fryen kunste dohen geordent syn, das  
 ymands sich undir yn der egnanten kunste unde practica anneme, adder ymands sollichs  
 zcu thun zcu sich czyhen, der in dem underwyßung thue unde practicire, das zcukünftg-  
 35 lich nicht großer mynnerunge daruß irwachße. In dem allen guten fliß ankeren, domit  
 unser schule wedder zcunemen unde sollich adder andir gebruch an uns nicht mehr  
 gelangen dorffe, kompt uns von uch zcu gutem dancke. Ex Lipczk sabbato post  
 omnium sanctorum.